

■ CURTAS ISTORGIAS DAVART LA DEMOCRAZIA (11)

# Marketing politic – In'Instrucziun electorala d'avant 2000 onns

DA CORINA CASANOVA,  
CHANCELIERA FEDERALA

Suenter che las elecziuns en divers chantuns questa primavaira han servì sco basa per in'emprima bilantscha, sa concentreschan las partidas e lur candidatas e candidats ussa sin il cumbat per ils sezs dal cussegl naziunal. Tgi che candidescha e vul vegnir tscherni dovra blers amis e partisans e sto persvader las massas. Co fan ins quai? Respostas dat dapi passa 2000 onns in mussavia detaglià e pratic.

L'onn 63 avant Cristus l'ha candidà l'advocat ed um da stadi Marcus Cicero per la carica la pli auta ch'i deva a Roma: il consulat. Ses frar pli giuven, Quintus Tullius Cicero, ha gì gronda fiduzia en las qualitads e las schanzas da Marcus. Tuttina ha'l redigì per el in mussavia per ses cumportament durant il cumbat electoral, il «Commentariolum petitionis». Quel declera pass per pass co ch'ins gudogna e trategna amis e partisans e co ch'ins



persvada las massas. Ozeni discurress ins d'in concept da PR. Il Cicero giuven recumonda al Cicero vegl da realisar ses concept minuziusamain e diligentamain tenor plan, senza spargnar ni forzas ni expensas.

### La confidenza en sasez è la basa

Il pli impurtant per il success electoral saja l'atgna persvasiun. Per nutrir e fortifitgar quella recumonda Quintus a ses frar Marcus da far in trenament mental, sco ch'i fan oz er las sportistas ed ils sportists. Quintus scriva: «Sche ti es en la publicitad stos ti

pensar d'in cuntin: Jau fatg carriera politica, jau less daventar consul, consul da Roma!»

Marcus Tullius Cicero l'ha gudagnà il cumbat electoral ed è vegnì elegì sco consul da Roma l'onn 63 avant Cristus. Anc oz sa mintgin ch'el era l'oratur il pli renumà da l'imperi roman ed in grond filosof che s'è fatschentà intensivamain cun dumondas dal stadi e dal dretg. Anc oz vali la paina da legger il mussavia electoral da ses frar, betg mo per las candidatas ed ils candidats da las elecziuns dal cussegl naziunal dals 23 d'october 2011, mabain er per las burgaisas ed ils burgais che han il dretg d'eleger.

Ulteriuras recumandaziuns da Quintus Tullius Cicero a ses frar vegnan preschentadas en las proximas contribuziuns. Ulteriuras istorgias e la pussaivladad da commentar ellas datti sin mes blog en l'internet sut [www.bk.admin.ch/chanceliera](http://www.bk.admin.ch/chanceliera).